

NAFARROAKO ITUN EKONOMIKOA. Iruñeko ordezkaritza bihar bilduko da gaia aztertzeko

Madrilek atzera egin du Nafarroako Gobernuari eginiko proposamenean

Ahalik eta azkarren bi aldeek arteko «bilera politikoa» egin nahi du Ogasun Ministerioak

I. Arrizurieta | IRUÑEA

Espainiako Gobernuak Nafarroakoari Itun Ekonomiko berria adosteko eginiko proposamena atzera bota du. Bi aldeek arteko «bilera politikoa» ahalik eta azkarren egitea eskatu du.

Joan den astelehenean Miguel Sanz Nafarroako presidenteari iragarri zuen Gobernuak ez duela itun berria sinatuko, Madrilek eginiko proposamenean autogobernua mugatzen duten «baldintza asko» sartu dituelako. Sanzek hiru gai aipatu zituen: udaletako finantza egon-

kortasunaren tutoretza Nafarroak egin beharrean Madrilek egin nahi izatea; inbertsiorako pizgarri fiskalak mugatu nahia; eta Foru Erkidegoan xede jakin bat duten zergak ezarri nahi izatea, osasuna ordaintzeko erregeien gaineko zerga, adibidez.

Espainiako Gobernuak eskaintzen zuen ituna sinatu ordez, aurreko urtekoa luzatu nahiago zuela gaineratu zuen Sanzek. Dena dela, negoziatzen segitzeko prest azaldu zen.

Ogasun Ministerioak atzo jakinarazi zuen ituna berritzeko proposamena kentzen duela,

eta lehenbailehen bi aldeek arteko «negoziazioak berrabiltzeko bilera politikoa» nahi duela. Francisco Iribarren Nafarroako Ekonomia kontseilariak ez zuen Madrilek hartu erabakiaz iritzirik plazaratu nahi izan.

Iribarrenek Itun Ekonomikoaren negoziazioan parte hartzen duten Nafarroako ordezkariak bilerara deitu die biharko, diputazioan, 11:00etan.

Oposizioaren gehiengoak Nafarroako eskumenak eta forua defendatzeko «irmotasuna» eskatu diote Sanzi. Hala ere, lehendakariaren «haserreari hau-

teskunde kutsua» dariola esan du batek baino gehiagok. Atzo bertan Juan Cruz Alli CDNko presidentek Madrilek proposamenean atzera egin izanak Sanzen «hauteskunde jokaldia» agerian utzi duela aitatu zuen. «Hauteskudeetarako bost hilabete falta direnean PPren aurka joaten saiatu da Sanz, baina inork ez dio sinetsi». UPNk PPrekiko «erabateko jarraipena» egiten duela esan zuen Allik. «Nafarroako Legebiltzarra onartu legeak, Kongresuan UPNko kideak errekurritu izana da horren adibide», esan zuen.



JAGOBA MANTEROLA / ARGAZKI PRESS

Javier Otano Nafarroako Gobernuako lehendakari ohia ere —ezkerretik bigarrena— gonbidatuen artean izan zen, atzo.

Irene Arrizurieta | IRUÑEA

Nafarroako sei legegintzaldietan legebiltzarkide izan direnei harre-
ra egin zitzaien atzo Parla-
mentuan. Egoitza berria erakutsi
bidenabar, 1979ko Nafarroako
Gorteetan egon zirenak eta
gaur egun jardunean daudenak
bildu ziren.

Jose Luis Castejon Legebiltzarreko presidentek diosala harrera euskaraz eta gaztelaniaz egin ondoren, Parla-
mentua jardunean izan den 23 urte-
otan Nafarroa zenbat aldatu
den azpimarratu zuen. «Nafa-
rroaren errealtatea erabat al-
datu da. Gauza batzuk onerako,

«Nafarroan gauza asko aldatu dira»

LEGEBILTZARKIDE OHIEI OMENALDIA. Parlamentu berrian harrera egin zitzaien atzo

beste batzuk ez hainbeste». Al-
daketa horien lekuko, egoitza
berria bera ez ezik, nafar politi-
kagintzan orduan eta orain pro-
tagonista direnen hainbat ar-
gazki. Hamalau argazkilarik
apailatutako erakusketan, atzo
Legebiltzarra ikustera hurbildu
ziren asko franko gazteago eta

ile urdinik gabe ageri ziren. Le-
hen Foru Parlamentuko partai-
de izan zirenen artean bisitan
egon ziren Carlos Garaikoetxea
edo egun Arartekoa den Maria
Jesus Aranda. Biak ala biak
«minez» gogoratu zituzten poli-
tikan hasi berriak zireneko ga-
raiak. «Tantsizioan politika ilu-

sio handiz egiten zen; geroztik,
Nafarroa asko aldatu da», zioen
Garaikoetxeak.

Castejon baino lehen Lege-
biltzarrak izan dituen bost le-
hendakarietatik, bi soilik hurbil-
du ziren hitzordura: Balbino Ba-
dos eta Javier Otano. Azken
hau izan zen argazkilarien ha-
rreta gehien piztu zuena. PSOE-
ren ustelkeria kasuengatik epai-
tegietatik iragana, ez zuen txin-
tik esan nahi izan Otanok.

Huts egin zuten besteak
HBko legebiltzarkideak izan zi-
ren; ez ziren agertu ez hasierako
Parlamentukoak ez hurrengo
legegintzaldietakoak ere. Egun
talde mistoan diren Batasune-
koak ere ez ziren harreraren izan.

EPAITEGIAK

Guridi Lasari 30 urteko espetxea ezarri diote Lopez de Lacalle hiltzea leporatuta

Agentziak | MADRIL

Iñigo Guridi Lasari 30 urteko espetxe zigorra ezarri dio Espainiako Auzitegi Nazionalak, Jose Luis Lopez de Lacalleren hilketatik. Atzo jakinarazi-
tako epaian, Zigor Alorreko Bigarren Salak «frogatutza» jotzen du Guridi Lasak Lopez de Lacalle hiltzeko agindua jaso zuela, eta, ETako beste bi kiderekin, Ermuko Foroaren sortzailearen etxebizitzan zein zen jakin zutela.

Lopez de Lacalleri «astebeteko jarraipena» egin ziotela ebatzi du Auzitegi Nazionalak, eta, «hiru aldiz hura hiltzen saiatu ondoren», 2000ko maiatzaren 7an egin ziotela tiro.

Guridi Lasa 2001eko otsailaren 23an atxilotu zuen Ertzaintzak, eta atzeman zioten arma hilketan erabilitakoa dela egiaztatute. Horrenbestez, Guridi Lasa «hilketaren egile gisa» zigortu dute.

Epaiketan Guridi Lasak ETako kide dela onartu zuen, baina ukatu egin zuen Lopez de Lacalleren hilketarekin zerikusirik izatea. «Inoiz» ez duela tirorik egin ere esan zuen.

Beste bi epaiketa atzo Auzitegi Nazionalen

Bestalde, Josu Gotzon Larreak ukatu egin du ETArekin loturarik izatea eta Juan Maria Atutxa Eusko Jaurlaritzako Herriazaingo sailburu zelarik haren aurka atentatu saiorik egin izana. Mexikotik deportatua 2000. urtean, Larrea-
rentzat 57 urteko espethea eskatzen du Auzitegi Nazionalako fiskalak.

Atutxaren aurka atentatu saio hutsegina izan bide zenean, 1994ko uztailan, Katalunian zela adierazi zuen Larreak. Haren bi lagun kataluniarrek berretsi egin zuten deklarazio hori. Auzi horregatik zigortuta diren bi presok ere, ukatu egin zuten Larrea ezagutzen dutenik.

Beste epaiketa batean, Iñaki Beaumontek onartu egin zuen ETako kide dela, baina ukatu atxilotu zuten egunean UPNko Iruñeko zinegotzi Miguel Angel Ruizen aurka atentatua egiteko asmoa zuenik.